

四庫全書

集部

欽定四庫全書

集部

皇甫少玄集卷

一至七

詳校官監察御史

臣曹坦

中書

臣

劉源溥覆勘

總校官進士

臣

楊懋珩

校對官中書

臣

趙秉淵

謄錄監生

臣

郝朝棟

欽定四庫全書

集部六

皇甫少元集

別集類五明

提要

臣等謹案皇甫少元集二十六卷外集十卷
明皇甫湜撰湜字子安長洲人嘉靖壬辰進
士除工部主事官至浙江按察使僉事事迹
具明史文苑傳是集凡賦一卷詩十九卷文
六卷又湜歿之後其子樞等裒輯賸稿得詩

八卷賦及禠文二卷編為外集古文非洙所
刻意亦不擅場其詩則憲章漢魏取材六朝
古體多于近體五言多于七言其持論謂王
宋反元習之靡而不能不病于聲李何矯一
時之弊而不能不泥其迹可謂篤論蓋洙與
黃省曾為中表兄弟早年襲其緒餘亦宗法
北地之學及其造詣既深乃覺摹擬之失故
其論如此然其鑒李何之弊則云詩可無用

少陵取法迪功則云詩可無用近體又云七
言易弱恐降格為錢劉亦類于懲羹吹虀者
矣王世貞藝苑卮言嘗謂其如輕練短幅不
堪裁翦陳子龍明詩選亦謂其無縱橫蕩逸
之致豈非以取徑太狹故窘于邊幅歟要其
婉麗之詞綿邈之神以駢駕昌穀蘇門固無
媿色也乾隆四十四年四月恭校上

總纂官

臣

紀昀

臣

陸錫熊

臣

孫士毅

總校官 臣 陸費墀

皇甫少玄集原序

上帝發祥錫我皇甫乃有樹名周室紀績彰門由茲以降鮮不有文以華中國以昌休胤是故周書述微子之命詩人載有客之篇其來尚矣炎漢德衰弘農慷慨陳辭束身歸黨觀其對策日食應詔自效自頌諸篇史稱言不忤其心矣槐里削平禍亂功高不賞閭忠干說拒而譏之曰委身本朝守其臣節雖云多讒不過放廢猶有令名死且不朽反常之論非所敢聞嗟乎此言雖與

日月爭先可也玄宴自以漢人不仕魏晉託言尫弊棄
跡邱園後之君子知晉徵士而不知漢逸民亦不亮其
心矣若夫博觀宏覽時號書淫守玄釋勸可以見志高
逸立紀可以考學豈以侯王屑意乎時則傳烈女而龐
娥釋序三都而左思顯何其偉與李唐之文至昌黎而
三變近道持正首得其傳著在文苑常處厚稱其排百
氏之雜說判九流之紛蕩徵會理軸遣訓辭波蹈正超
常曲暢精旨比之賈誼劉班云一時操管之士若溫岳

松枚彬彬乎競美矣而茂政孝常則入室崔王方駕錢
劉安定八宗於茲為盛蓋自德參以弘義明公之屬直
言事太宗而談文者與唐相終始也五代以來寥寥無
聞吾仲氏子安考求先葉至宋元之際未常不撫卷歎
息以為藥氏之下降杜生之既微不是過也爰入我明
籍鳳陽者以武功顯居睢州者以望氣用寓安東者以
鄉舉達子安謂予曰是皆未足以重吾宗復其世業而
光昭之固在吾等耳於是苦心研力窮搜遠討博采精

思謂非班馬曹劉不足以詣其極蓋今之為文者王宋稱一代之宗李何為中興之冠然王宋反元習之靡而不能不病於聲李何矯一時之弊而不能不泥其跡故其為文雅意於史漢莊騷間而於詩獨有取於迪功然又狹小其篇章乃刪其遺文以為外集嘗歎曰會諸氏之長以追六代迪功其庶幾哉子安刻勵二十餘年其性敦靜簡默又能致其深沈之思其於詩鑄辭精而為旨遠體骨奇峻辭彩英發陳風諭則婉而不迫叙政事則

直而不俚頌功德則艷而不誣不取妍於一字不求工
於一辭肇端莫測歸趣難探詠之而有遺音咀之而無
窮味使觀者動心說志又以拙宦不達多感慨之辭亦
憂患之意與擬議而談則建安開元之盛蓋瞻忽間耳
子安之在藝苑猶機軸之有文錦廩庾之有秬黍而吾
宗之有子安則衣裳之冠冕而居室之棟梁矣惜乎天
不假年而竟止於斯也子安卒之明年其子秦樞捧其
遺稿請為刪定展誦灑泣掩卷而起者數矣今年秋秦

又申其請遂飲痛而為類編之稿凡十帖已卯居蓬二
集十取其一而不足仕使二集十取六七使旋客魏金
陵三集十取八九而有餘東覽則子安之所自定也若
其散篇漫簡殆與十帖相半則僅以類從不復得其日
月之先後矣總得賦一卷一十四首樂府一卷四十八
首古今詩一十八卷八百七十九首書序記表雜文五
十五篇題曰皇甫少玄集以示秦樞二子不惜空匱命
諸梓人秦樞可謂能子矣可以為孝矣刻成請予序之

嗚呼子安刪定吾集欲為吾序而弗逮也吾逮序其文
矣吾何辭昔王元禮七葉重光名德為盛劉孝綽宗人
七十聯華當世心切慕之故於先世之文采諸散亡編其
遺軼既輯先大夫五集與所著書又取大父韋菴公詩
文集而刻之今又見茲集之成也能不為子安喜不為
吾慰耶雖然青箱之學屬在後人三都之文必資名世
予但序次其目故稱先人云若其標譽騰聲程往鏡來
以永遐軌虛諸首簡俟擅辭宗者華陽山人沖書

原序

兩儀奠位二曜揚輝經緯其間書契攸作文之時義遠矣哉雖有懿德鴻勳非假典謨曷由宣闡故壽不固於金石而名可齊於霄壤者以此世之談理學者詆為末藝守吏局者謂非適用殆猶茹藟糗者難與道蹠腴之美蒙旃毳者不足與語綺縠之華也矧言本心聲詩緣情靡游心內運應物外感性機妙發氣韻天成爰稽作者良亦艱矣匪作之艱知之惟艱匪知之艱言之惟艱

此輪扁不能臚斲而伯牙終於輟彈者也犧軒既邀虞
夏寔湮宣父釐正之後卜氏泝其源申毛韓鄭沿其流
咸能詮風人之旨窺作者之意歷世近而習說真也倬
彼我祖敦詩明雅先考績業哲昆嗣響廼誕仲氏聿秀
厥宗七齡夙悟卽懋藏膏之志九歲綴文遂精彫篆之
技至乃研討六籍旁覽百家朝帷不卷夜榻幾穿室人
讓麥而莫知侍兒竊饌而無見其篤如此由是學臻博
極思覃深湛緬豪士於西州追玄風於東晉家稱千里

國號無雙矣兼以氣資爽邁儀容儼肅後進資其善誘
末學藉其人倫而余分則友于義同師授雖士龍特眷
於平原惠連最鍾於康樂蔑以踰也每有述造輒相詔
眎商榷砥獎可得而言方其家食含章與徐生二黃定
交筆札之間篤嗜工部既而何李篇出病其谿徑專意
建安嘗曰詩可無用少陵也至解巾登仕與蔡王二行
人廣搜六代之詩披味耽翫稍回舊好雅許昌穀乃曰
詩可無用近體也又與王文部李司封唐陳二編修劇

談開元天寶之盛而心醉焉乃曰詩雖選體亦無使盡
闕唐風也至為歌行一本樂府而叅以太白槩括饒吹
之餘猶曰七言易弱恐降格錢劉也故其詩特工五言
而七言近體薄不經想余與聯組二京方珂三署被竄
則郡檄交移承諱則倚廬同戚雖伯季具邇而敦賞獨
深矣試為標論詩蓋錯綜魏晉而託宿於唐英賦則馳
騁屈宋而逸駕於散騎文則陶鑄班賈而呈範於中郎
其為篇也幽玄以通思春容以御氣婉麗以陳詞和易

以達理憤懣以抒情綿暢以該事雋永以歸趣其始構也隻字不愜於心片言無艷於目踴躍窮思擁衾寤索曾不少休是以吟苦則彌日不就神來則下筆立成今稿中或兩字未竄或二語並存致蓋密矣若夫錦必有龍巖非無當苟慙博物疇發斯蘊欲倣胡廣於官箴擬劉逵於都賦病未遑也柰何覩姱容而決驟過屠肆而垂涎妄意吠聲詎曰知味哉方其潛心經術晞軌儒林若易序詩說春秋考原周官雜志亦略槩見早謁陽明

洞析道體亦其性靜得之若與東郭鄒氏揚山方氏往
復諸書鋒辯莫之能抗至其佐邵分臬坐有餘嘯案無
留牘魏懷慈父越畏神君固知戟臣歎辭賦非夫蕃侯
耻翰墨垂績良有以也然才高妨位命達憎文淪落一
官見嫉衆女不令第嘉頌於屬車備清問於宣室是皇
猷無潤於拔藻而國典不寄於方聞也嗟乎當宁按圖
詎攬燕臺之駿開閣倒屣惟羅葉邑之龍匪今為然振
古同慨矣歲在丙午丁辰茶酷頗有憂生之累貽余春

日齋中讀丹經一篇系曰夜來更加竄定庶幾可觀詩之難言如此後世誰相知評定余文此陳思所以興悲也亡何長逝命矣夫命矣夫然年雖中促而名則宏遠矣胡云未究厥止哉余知兄詩庶能言之不特可比申毛韓鄭亦卜氏之亞也昔孝常次補闕之編王縉表右丞之集顧余謏劣曷克勝茲幸而伯氏運斤二孤命梓芟采精覈都無遺誤猶謂標譽騰聲以俟宗匠聊以習聞余兄之言揮涕而告秦樞俾知先人制作之艱若此

云爾叔弟百泉山人沆謹撰

原序

辛亥之春姪秦樞遺書荆南以少玄成集寄余為序啓
而誦之宛如生平聆其詠謨傷哉懷也灑泣興思夫兄
夙稟純姿卓負淵識誕秀吾宗寔惟殊祥異表况乃宏
覽載籍研精雅頌沉思旁索日無怠晷夜或忘寢九流
衆技之書海上名山之旨石壁金匱之藏真文鴻寶之
秘罔不游心博摠斯固通人之所難而獨兼之能不頭
顛早白形神易槁者哉兄嘗志在世用每與談古今論

豪傑之士則慷慨拊踊不讓往烈今觀其與華陽長公書亦可以見然以特立不羣之志翫辭一世終莫能盡其才是以作慙知慨遇賦以自寄夫世嘗謂文學之子鮮洪世猷此乃鄙俚不識謨訓執蠅蚘而議神龍者也昔曹植思必凌雲翰俱緯國猶不足於文藝之間而欲求自試以效錐刀之用由今以觀憂在國家忿吳蜀之患不遑寢食思得偏師之任不顧乘危蹈險騁突士先建功鍾石以絕詩人彼已之譏或能用之當有見諸成

業豈盡以為言之不能行也故曰騏驥長鳴而無伯樂
以昭其能是以於悒而竊自痛者也兄自少為詩歌遂
藻于聲偶較蹀李杜矣時亦未有知者及既蒙嘉運稿
迹宗賢稍與時輩相逐然終非其好蓋自居先大夫憂
已盡拙時品而歎持上躅矣夫精于義者不繫乎物知
所止者不同于流而彼竊小知以附閥議其奈之何今
試舉其一二如雪意煩辭髮江流倩浣腸如啣魚上水
鳥驚燕落橋花類皆少陵之靡妙雖集多不載猶可別

傳兄嘗同為秋讌寒夜之作許與過甚既改服東浙寄
余書云將事考槃以卒初志冀與同獎風流益增標勝
余方計太夫人中道而兄以奄逝生平景懷悼嗟何及
遂使國家登禪太息於斯文而人倫模楷悵絕於具爾
吁其已矣敬序遺編因之寄慨李弟理山濂謹書

欽定四庫全書

皇甫少玄集卷一

明 皇甫濬 撰

賦

悼懷賦

并序

嘉靖丙戌之秋余兄華陽先生偕友人五湖陳君有白
下之遊余與弟子循子約追餞江潁維舟極飲時滄波
凝冷微月揚暉客有誦太白之文者曰朝心不開暮髮

盡白登高送遠使人增愁余聞之暢然感激樂往悲來
慷慨懷舊泣下沾襟華陽先生謂余曰能為我賦之以
資是行乎余曰唯唯賦有悼近懷遠之句盖取材於潘
氏秋風之作遂以悼懷命之酒酣興發援筆成篇懼夫
纂組之不工而貽笑於疾行也辭曰白日暮秋風生朝
梧墜宵露零長塗啓旅魂驚舟枉渚之清瀾樽曲亭之
飛楹慄兮慄兮愁寂寥而多聲况兮愴兮思黯忽而不
明狼籍盤珍錯落華鐙列爵無算揚歌靡停晨曈曈其

欲粲月杳杳其含精榜人齊唱僕夫咸興聆班馬之長嘶感辭燕之飄輕胡壯士之慷慨俄舉手而抗旌臨變哀之蕭運淚微墮而緣纓烟翳翳以遙入棹靡靡而遄征惟流波之遺響鮮逝裝之留形耿悼近之幽暢抑懷遠之恨情豈斯適之彌久有長違之塵邈羨茲遊之昭曠獨撫膺而驚愕匪公子之逍遙詎王孫之淹泊似抱策而求售迺登車而踴躍激雄情於孤劍替羈憂於飛藿思附鳳而攀龍願離䟽而釋屩承玉署之芳音挹金

門之餘渥胡時運之不然怵三第之俱落徒益憤於弱
穀聊慰志於蒙璞心百慮而拘緜腸九迴而焚擢藹賓
筵之嘉奏渺彤樓於寥廓懷脉脉而朝驅散縈襟於旅
酌望瀛海之清霞侶東山之幽鶴安春稅而迫冬幸緇
塵之可濯昭達觀而無愠豈微躬之奮薄翳大儀之運
流孰嬰情於豐确識躁靜之有常寧友道於伊洛徃興
居而如一恨緣悲而偕作雲翩征以淒其鴈邕鳴而嗟
若望行車之歸來即園廬之永樂

亂曰草木搖落兮天地寒關山迢遞兮歲月殫蘊藪兮
流芳滅玉柱兮綠水殘恐美人之遲暮兮望城闕而嗟
嘆息余駕兮江之干追余樂兮聊潛盤

離思賦

并序

甫子感於時而興於思其友朱子俄將有遠行作離思
賦也

廓靖貞以薇居兮泊吾御夫四時亮無名世之宏偉兮
驟軼群而登巍惟斯時之迅邁兮痾吾衷其不可回憂

縣縣其若萌兮又感乎友之將行怒離羣而索居兮疇
宜予之幽情洵往古之不遐兮懽獨愍夫吾生仰前良
之遺軌兮聊抑志而自寧咸遙軒而遘虞兮翼世太清
罔曜靈之常豐兮奚多悲而不平駢厯垓以遲遲兮相
俶迤之多坎日晡晡其將落兮雲繽紛而承憶迴飈襲
於衡側兮魂營營而靡宴予侘傺而顧懷兮懣予心之
不然駿弗必御良弗必庸兮始以為過言目騷衷之殫
棄兮委和氏於泥間何古人之不誣兮惟覩象而后宣

糝蕙芷以充觴兮又申之以幽蘭紛鬱毓其芬蓋兮珩
寶璐而珊珊羌弗察其姤嫖兮膏予馬以盤桓且予發
於蒲坂兮夕指憇於岐趾過虞虢而遊目兮歎息而不
遑已謀帝賚之足徵兮感輔台之在鄙式茲巖以徘徊
兮神發夢而滋惑嗟遇合之何常兮慨重華之不覲汨
吾歲之日邁兮泣漣落而累辟繫騏驥而弗乘兮即遐
落而躊躇服跛狎而振縹兮雖造父其焉如泝餘皇以
登巒兮弊日月而靡由涉長河之浩渺兮越棄置而弗

售悲吾生之不及兮悼睽阻之疚心思返旆於穹谷兮
念鳴鶴之在陰憑浮雲以迴眺兮涕橫墜而弗禁亮洪
流非一葦之可障兮炯貽則於周任時疊疊而不居兮
言遄徂於故岑既緯繡而猶求合兮亦非君子之所欽

愍知賦

并序

余弱冠從諸生頗懷連蹠之志世俗所遺於時鮮曜山
南葉公按吳見謂逸才甄獎篤顧期以揚藝之秀允茲
人倫之表既而邈焉雲散飄淪靡戾負心含疚忽將二

紀公亡且五稔於今矣今年冬旅退之暇寓目于西城之隅歷公舊廬而感焉夫匪遇實難唯知之難知未可以易言也遂援毫悵然為之賦命曰愍知云

時游顧以寫憂兮眷崇城之曲隅馳天衢之蕩蕩兮倚觀闕而踟躕忽旁睨乎荒蹊兮歷伊人之舊居羣雀下於堂壇兮寒煙翳於榛墟雲亶亶而遙征兮感逝者之焉如逝不可作惕焉疚心追疇昔於響像兮迄踰紀而迄今辱國士之隆顧兮奉綢繆之惠音雖蒙璞而鑒章

兮諒思永而慨深夫予思之曷已兮痛五載之不覿撫
虛宇而徘徊兮涕淒泣而霑臆塵掩泣而不進兮野蕭
條其無色惟知己之實難兮嗟人命之有極悟莊生之
達旨兮聊委順而自釋迺弭節而言旋兮御幽琴以永
夕

紫薇花賦

并序

梧亭甫子讀書處也亭之後有花一株寒暑七周榮悴
自若甫子竟不知此花何名也昔人有潛業持經體潦

弗悟身園棄違者庶幾哉而游情多識之流方斯遠矣
庚寅夏日甫子卧病茲亭耽玩玄典邈與世隔行藥之
餘聊亦撫時周覽友人有指花而告予者曰此紫薇花
也予始異之既而恍然懷感夫物不以遠而不遭近而
不遺也再稔之間睽合如此蕭辰方改繁英且茂流連
步屨徘徊歌枕遂述短賦以散幽衷辭曰

嗟芳蕤之異挺侯至近而見遺軫痾懷於興寤迺遠覽
而長思豈伏鄙之微彥類斯英之莫知幸知斯之非晚

誓等好於無違每容與乎今合顧慨吒乎昔睽言收雅
歎載閱殊芬根輪囷而下固枝蜷糾而上分裛駢葉以
皓露敷密葉之繁雲叢柯稠靄秀色氤氲惟茲軒之幽
獨何可一日無此君也乃若朱明肇謝龍火西傾瓊丹
沃而吐艷霞赭爍以賦形或扶疎妍儷而可悅或宛轉
姿映而難名霓裳造列後先有經旂鸞和會萬綬千纓
攬之擬象孰厥化成及夫殫而形之噫何為乎陶陶然
予心之獲也薜榮不朝伊屆秋而靡易桃李爭妍伊持

重而奕奕總其質巨以實也類其容麗以則也遠而望
之若垂紳正笏休休乎德之茹物也近而親之若攜錦
布繡輝輝乎文之緯國也鑠哉宏茂衆美所專豈婆娑
之意盡陋葉落而悲年保空谷之幽馨諒華池之足宣
清風徐動明月微娟悠悠我心誰與晤言悲春華之不
實絢紫閣而空傳履閒庭以載嘆時徙倚而屢遷垂貞
嘉於餘藻永封殖於茲軒

晨熹樓賦

莽塵野之四紆天冥冥而未起樹承雲以雜襲翳風霾之多軌接箕穎於茲徑見蒼標之孤峙枕清流而俯庭柯兮伊美人之幽居遺斯心以長往舒高眺而躊躇日隱隱其升皋慘孤烟之映墟曠逍遙以自畢遂初服於所思慨嘉招之昌豫實携手而纛征委出處於大順匪丘園之獨嬰候平陂之不常復惆悵兮焉之年疊疊而長逝俟河清其幾時鴻翔空兮千里仰浮雲而賦歸循蕙路以衍衍反琴書之舊棲惟茲樓之遠隱實迷途之

所由忽殊岐於涇渭瞻衡宇而願留謂松菊之久蕪猶
依依而候舟彼濟濟之多士兮吾曾何異於滄海之一
漚豈如沉吟以自足覽斯道之悠悠風沙回沓而蔽天
翳搖落兮凜秋嗟哉晨膝而宵淵兮紛虎膂而劍喉一
俯仰以迴眺譬鳥道之全輶既投吾之塵纓思容與乎
茲樓委孤懷以從子終歲暮兮偃休

小征賦

并序

予以孟冬治逋于衛墟作小征賦

歲孟冬之慘烈兮余有事乎汲城晨雨霽之遄阻兮暮
指途而遂征風飄飄以升輿兮日杳杳而抗旌露夜下
而羈旅兮魂營營之靡寧詠詩人之遙役兮瞻岵岵而
疚情徧黃丘而息駕兮矚行阜而南邁伊故鄉之永懷
兮氣交憤而長喟雪氛氲而蔽天兮憫征人之無衣野
寂寞其遼迥兮雲孤泊而靡依感鴻鳥之違寒兮鳴邕
邕以羣飛過邕墟而有懷兮訊滑臺以延佇漸淇水之
湯湯兮激衝波於迴渚美氓蚩之困悔兮悟漢廣於求

女願履幽而反正今年冉冉而不與遵河津以遐驚兮
傳余車於衛郊諒取辟之不遠兮信昊天之孔昭彼既
耄而警訓兮宜令名之益邵嗟弱植之易遷兮憚我辰
之不遭期浚谷之考槃兮隘碩人之弗告苟委順而弘
觀兮從吾好而自足終秉耒以絕榮兮永放歌於巖曲

讐言賦

并序

昔與滁陽胡君並為郎胡參湖藩補外離索之歎忽焉
改歲己亥之秋余謫官魏郡胡表覲北上旋車云邁惠

音顧省因書郡守開以林父士伯之談禮經有不信之
文谷風無棄予之嗟予感焉詩不云乎無言不讐作讐
言賦云辭曰

余遭時之遷斥兮背玉門而羈旅心冤結之憑噫兮乃
汨徂乎茲土忽孟秋之改夏兮申嚴霜而日滋觀草木
之搖落兮氣蕭瑟而嘆時猶不遠而貽戚兮數讐殃而
自思昧微彰以俟日兮固大雅之所譏世同糅乎玉石
兮衆滔滔而不反要必察於吾人兮俟河清其逾遠朝

發軔於層城兮夕吾宿於河渚意慷慨而不平兮愁寂
寥而無語懷百憂以短歲兮怒離羣而索處嗟君子之
信衷兮音翩翩而存予吐芬蘭以詔牧兮詠伐木之許
許有谷風之棄遺兮難等日而欄舉惟東省之游踐兮
尋履綦而並入爰清靜以忤俗兮服炯戒之貞吉漱百
氏之腴潤兮貫羣經之幽蹟敦久要而不忘兮庶明徵
於疇昔辟古今於旦暮兮竊興慨乎曩篇良斷金之攸
利兮豈傾耳於流言量伊人以考德兮允前哲而比肩

石父賢而在厄兮仲遭途而解驂
祁宥向而乘驛兮謀覩患而棄餐
履鄭郊而班荆兮辭未訖而舉還
苟信美於高俎兮及堂阜而稅焉
世彌久而日新兮善于何而不有
志廓落而耿介兮寤辟標而增疚
懷楚江而屑涕兮遡歸雲而翹首
諒無言之不讐兮託永好於瓊玖

慨遇賦

并序

上邱狩之歲天水胡公移撫河藩
厥冬火于臺星氛坼塗飈襲滋悍
公膚及焉孔遠天道延於帝命龍
鸞之文

蕩為餘燼爰用列上恭戮反服之懷乃眷秦雍何怙之
嗟不替嵩洛七邦之民拊踊悼心時有封壤之吏謂公
位隆而澤流名立而身退可以稱遇時者余謂其不然
夫以藻若翔雲辯若驚波呼吸而盪羣芬揣摩而奕帝
業斯有合世之才宣哲鴻駿度越拘攣片合而登鉉台
一沃而依日月斯有遇時之會然且徘徊六飛何云物
色瞻言三省難其簡睿既合而離時騫以翕謂之何哉
此志士所以扼腕而千古所以痛心者也是故士之生

也有其才矣而或未許其才以不合世也有其遇矣而君子不以為遇以言乎未盡也聊因暇日為之賦以寄斯慨命曰慨遇云爾

望靈河之洪濤兮緬八龍之歷茲眷豐沛而警乘兮揚白水之鸞旗乾坤衍其禋精兮民夷謠其孝思惟邱狩之命臣兮抗余旌於東邱慰皇輿之仄席兮背甘棠而來游歲玄冥之仲月兮公臺火而為災徵天道於七日兮爰反服而西邁登大庭以繇睇兮予有憾於烈風覽

士弱之遺言兮誅閹伯而靡從諒匪人而實天兮侯離
合之無端在賢聖而困阨兮良自古而有然無尺寸而
後人兮廼隕身乎朔土舒含章以敷言兮孰五葉而邁
武彼時去之何速兮感伊人之歎時雖委順於運化兮
終慷慨於此辭心鬱結而涓沸兮邈皇波而賦之重曰
悠悠蒼天靡有極兮幹流而邈時焉識兮賢不必遇古
所惑兮君子樂天有恒德兮明若慎竈非所及兮履道
從邇僑吾則兮

別友賦

并序

別友賦者甫子別其友陵陽王君惟楨而作也王以左
官滯越三載甫遷南曹復攝推事而來賢者悼其不遭
尋理還轅甫子餞之湖陽悲惟疇往泣下霑襟爰倚舟
而賦之辭曰

何吾人之奇薄迄蓬飄而鮮寧乃越關之紆轍恨濡迹
於三齡輟鸞響於華閨復脂車而告邁念啓處之不遑
魂營營而靡屆志悼遊而寡徒暢幽襟乎予美與携手

而慰心翩雲征乎江汜去皇闕而永徂類頽波之絕源
爰省愆而軫憂顏瘳鑠而煩寃遨湖渚以遙餞詠哀風
於鵝羽望寒山之集霰隱塗潦之多雨究人事之終始
痛吾心之長愁悲一別之異鄉涕沆瀾而不收儀紫庭
以翔翥豈鳳輝之能戢諒形留而神徃邈晨風而增悵
牡丹花賦并序
鄰居牡丹花一株甚麗花時盧子觴余玩之而心有會
焉走筆成賦

悅茲芳之信麗何瓌豔之獨殊擢纖莖以摘秀比文容
於莊姝鱗衆英之灼爍承朝日而為霞體敷瓊而布葉
萼含金而振華於是熙春盛節才妍志綺携好仇以逍
遙延清芬於步趾苞宏美之淳嫋流玩目而未已覽品
物之靈化珍賦象之妙姿託君子之幽軒吐惠心於令
儀永茲辰以散藻亦何美於華池

石渚賦

并序

乙巳夏五月予方待罪西旋而石渚公猥以卷命書舊

作興念受知瞻戀彼美乃因公雅號石渚而賦髣髴其
意以贊以諷洩我睽思云爾

乃若神委之津靈宗之壤坑崇臯之畢湊覲仙山於滉
漾氣網緼以旁鬱暉空澄而彌廣竒琛曜汭而的礫洪
涯乘雲而來往爾其沼潏潏深沅演澹汙而為渚也陰
暎瓊巒迴合瑤林石碧聳霄霞錦被岑䟽以沃焦之波
翳以若枝之陰時含和而吐秀亦宣廣而挹深於是爰
相爾居在渚之陽列瞰巖嶸凝眄溟茫挾埃塵而雲淥

結漂渺之玉房玩二儀而卷舒綜百氏而翱翔爾乃游
心委順稽於玄德漸紫庭之重明搏扶搖而騁翼弭鴻
征之懷渚嘉行清以眷國系遐軌而寄歡爰託諷於翰墨

後湖鴈賦

并序

予每過省閨則見羣鴈後湖之上迴翔而不去感而作
賦

余舊京之羈旅廼散矚於城隅有違寒之靈鳥矯歸翼
於翔塗系華林而傾藻紛棲泊於春湖背高柳之修巖

飄南雲以遐征戒儔匹於萬里懼矰繳之我嬰聊濡迹
以游憇終懷土而思縈日凝光而西墜山倒影於寒渚
淒澄瀾以羣浮仰崇岡而延佇亮豐草之可依愁繁氛
之襲予忽反顧以驚鳴振輕羽而孤邁濯煩襟於長霄
去寰流之塵隘言緹馬以悠悠感微禽而永喟

感椿賦

吾友南川朱子既葬其先君墓居不返日多哀踊純心
昭格不殖而榮享堂之隅爰有椿焉罅墉而達一夕載

茂及期而拱孟生號竹嘉荀冬抽王子撫樹猛獸夜殞
徵感之跡列於曩篇猗惟吾友千載同轍乃命其堂曰
感椿而為之賦曰懿茲木之森翳兮披重壤而效靈下
虬蜷而布體兮上扶踈而擢形驤日月於九重兮浥膏
澤於九冥爰假號於大椿兮彌春秋而不零循柯葉而
旁覽兮稽誕載之故儀感伊人之孺慕兮緣扁域而孤
峙靡故根而蘖栽兮不崇朝兮旖旎謠白華而永懷兮
痛南陔之丕祉猗有相之既茂兮恍有覲於斯堂華容

暢而荏苒兮獨隆夜之不陽哀猿嘯於林薄兮鳥低回
而不翔撫松楸而四眇兮淚流襟之浪浪惟靈輻之即
遠兮瞻素旆之飄揚臨幽隧而芬夜兮哀失次而無行
昭孝思之維則兮諒託美於茲芳嗟昔人之純懿兮假
物類以發祥貽高矩而孔耀兮允奕世而彌章

亂曰亶亶君子休有聞兮懿思洞幽粵稽訓兮銜卹厚
終孔殷純兮天錫厥類物美臻兮蘂斯叢斯春載榮兮
倏爾神化昭厥誠兮悠悠昊天哀罔極兮告爾胤嗣不

封殖兮

靖志賦

并序

我徂于南服官刑曹旅退之暇作靖志賦

歛薄躬兮靖志爰旅迹而游處瞻玄寢之崇山俯曾城
之華渚邈浮雲而永嘆伊懷哲之遐舉豈天道之有常
諒吾辰之若茲履末位之多凶恒惴惴以自持庶神聽
之孔昭共我位以俟之

皇甫少玄集卷一

欽定四庫全書

皇甫少玄集卷二

明 皇甫湜 撰

樂府

春宵引

高掌粲興霞雙闕颺輕飈玄陰苦修夜華美不崇朝靈
池蕩寒氛柔雪斂陽翹裔裔豐景入灼灼淑晷饒期君
騁逸轡方駕踐春宵

明月引

玉繩光早艷金壺宵未沈佇立春花月等怨秋河陰方
驚移翠牖遙睇入鸞林澄醪我姑酌縈絃誰賞音留輝
眷羈影流彩託微心

對酒曲

叢臺寒送杵淇水昨漸裳旅思鴻遵渚勞歌蟀在堂承
波微啓夜下葉早遘霜鄭袖垂初拂齊衾爛已張清光
正三五莫遽怨朝陽

折楊柳

陌上看楊柳依依滿洛川
良人從遠戍春色動經年
葉暗金窓裏花飛玉鏡前
臨風獨攀折心思亂繁煙

梅花落

素蕊艷窓紗寒閨歷歲華
不堪疑對雪何許定驚花
影惜紅粧變香慙錦帶賒
妾心零落盡猶自憶龍沙

紫騮馬

騮馬蹀金城桃花嬌玉纓
從來汗血種不愧絕塵名
協

月竒姿表凌風逸態生願言酬隱渥服御帝臺行

巫山高

巫山峯十二窈窕映江流翠壁濃銜日丹楓遠帶秋神
驚珠珮杳魂斷玉鸞遊猿響空岩夜誰堪達曙愁

隴頭水

分流懸峻坂嘶馬度寒山月照潺湲淚霜凋離別顏笳
聲雜隴樹鴈影沒秦關寄語金閨婦終持漢節還

銅雀妓

帷牀棲累榭椒鶴鎖深宮花月常如昔君王不可同綺
羅芳愛盡臺館御遊空惟有西陵樹時時入望中

王昭君

已恨君恩絕仍憐遠道難塵經蘭麝歇霜染翠蛾殘
毳帳催晨發悲笳慘夜寒玉顏常自惜休倚鏡臺看

出塞曲

昨夜羽書驚追徵六郡兵龍車臨廣武虎士會平城
苦戰邊雲落長驅漢月明惟應霍驃騎萬古共雄名

雨雪曲

邊雪舞空來紛紜像落梅愁雲凝虎帳斜日隱龍堆色
亂凋戈慘聲沉畫角哀直言銀磧度詎恨玉門回

長安道

御柳垂溝發宸花夾道開明光連騎入平樂鬪雞回郭
况方䟽穴王根正起臺望塵多逐彈別有副車來

芳樹

芳樹吐春姿列映寒塘側發日染朝妍流雲深夕色連

巖望如黛氛氲遙可拭玉筋泣掩閨金鞍游去國韶光
忽以逝攀條坐成憶歸從谷口居長林聊偃息感徃時
豈再悼別愁屢極夜來青蔥夢彌晒樗散植

臨高臺

高臺臨茂苑畫棟俯滄波東涵鉅海銀濤壯西繞連山
翠影多瑤樹丰茸輝曉日雕甍粲艷薄宵河千衢柳色
旗亭引百里花光寶軸過別有朱樓春日暖南隣北里
笙歌滿紅桃偏照浣沙裝錦鳥時迎踏青伴梁生隱會

稽寂寞自攀躋芳樹遊心斷浮雲望眼迷銅雀歌聲慘
啼鳥曲恨悽九華幾見遊麋鹿三休無復切雲霓直須
逃名百代後無事身退五湖西

春宵歸鴈

吳溪二月梅花暖北鴈歸行聯復斷繫足偏憐寄遠書
飄音屢雜相思管楚雲遙遙連塞臺關山月照客心哀
長安日邊爾應度為憑清影暫徘徊

東飛伯勞歌

清漣交頸戲文禽曹王羽芝停洛潯誰家新粧絕妍華
羅紈綺績日開霞鳳閨銀燭芙蓉帳孔雀金屏兩相向
年餘三五娉容媚明眸宛轉傍宜侍可憐如花風逐波
留芳待君君奈何

其二

驚鳥啼夜鶴迴翔綠珠碧玉遙相望誰家搗素步蘭墀
緘情忍意有所思金鋪珠綴瓊簾靜銀河斜月流輝冷
華容二八芳年歲蛾眉瓠齒姿絕世落花從風花復新

空留可憐愁度春

流水引

白日下兮江沱秋風生兮綠波汎澹澹兮逍遙曼予目
兮中河揚翠蓋兮掩青蘋停桂楫兮翳雲蘿芰覆沚而
難入佇澤蘭之幽芳蕖的皪以丹曜粲明霞之夕光望
羅袖之窈窕聿鳳翥而鸞翔歌采蓮以容與聲幻妙而
復揚裒遊菰之清露指皓月而自引蹇誰留其盤桓諒
予情之紆軫重曰木葉落兮露已寒思嫵婉兮隔雲端

冀一歡之可畢幸餘芳之未殫且弭節以忘憂緬佳期而竊歎獨鬱鬱其誰語聊宣之乎弱翰

鞠歌行

鳥有鳳兮鱗有鯢超騰景雲絕羈樊俯東海瞰西崑促齡短世愁煩寃履太行摧車轅同揉玉石誰為言牙絕絃期不存中心孔悼聲自吞河易清思難緩永慨今昔腸若燔

殿上曲

王春肇昌紀帝德仰文思明堂展肅翼嚴佇重輪熙翔
杓迴青天鳴鼉震嚴扉穆虞發遙警乾行扇巍巍泰階
協百祉華蓋濫鴻私峻雲靄懸陞敷藻鑠瓊棖垂衣龍
始御前闡鳳甫儀玉帛總萬國書文會八區祥謠浹居
圉川嶽固皇基承天乏嘉頌跼蹐奉崇徽

君子有所思行

崇墉升朝日垂曜臨九衢華闕鬱崔巍明明福天居通
波象漢流飛拱憑雲舒夙謬邦君顧矯迹履皇都振纓

建禮闈結綬承明廬貞軌豈足由枉徑易回車鼎鉉或
窘步夸毗為良圖繾綣生毛羽俛仰間榮枯惟子湛道
德盤桓亦奚須柔條結芳風藟蔓緣高隅始願不及終
拊心獨嗟吁封已眷初服長與沮溺俱

出自薊北門行

兵氣結陰山軍聲動五原詔屯七萃士戈戟蔽霜天建
橐憑怒啓授鉞出燕關壘和違受命效節策中堅銜枚
衝積雪驅馬涉冰川嚴圍宵再合鳴鏑屢驚遷兵交亘

歲月圖令竹帛宣諒蹈名王庭一鼓隳旌旃揚徽玉門
道飲至勞歸旋方陪屬車後紀禪奉登刊

結客少年場行

俠客氣何雄藏名軹井中四豪傾長事肅駕遠相從遨
遊空絕影顧眄遺英風純鈎扈錦帶潛穎結長虹急讐
歟電發怨吏不敢逢探丸入漢市挾匕登秦宮千金購
姓字三辰貫幽衷顧嗤甘陳侶邀爵事邊戎

有所思

惠風扇芳氣鮮雲照蘭林舞簾晴綺滿遊艇翠波深自
我塵瑤鏡載聞黃鳥音羅帷月自入歎恨徒盈襟

淮堤曲四首

城交綠水傍遠近沉樓光嬾棹愁堤盡淮堤幾許長

其二

烟草湖心劇雲花浦口迷淮南好風景多半屬淮堤

其三

楊柳拂湖波淮堤湖水多倘因團網去惠爾採菱歌

其四

棹女碧波遙花香錦帶飄
言珍芍藥贈耐可比容嬌

朝天歌二首

鳳侶駕行滿禁闌晨隨旅篋
近宸威春風緩落黃金陛
會有天香到褐衣

其二

雙闕春明簇瑞煙遙依玉掖
聽嵩傳日邊仙珮雲中樂
龍輦輕移在九天

揚州詞二首

龍舸千羣錦岸長
河堤萬騎羽林郎
綵雲似度霓裳曲
碧草猶含粉黛香

其二

錦纜牙檣駐翠華
維揚瓜步渺烟沙
冰河不為東風解
桃李爭開朧月花

江南曲

百花洲上望春暉
昨夜春從枝上歸
乍想江梅妬江月

忽驚飛絮如飛雪，美人流淚濕羅裙。
欲寄音書那得聞，孤帆片片高唐雨。
粧臺寂寂巫山雲，紫燕雙飛畫梁裏。
薄暮春風度羅綺，江南春色不可留。
我憶江南行復愁，妾心願附盤龍鏡。
携將淚影玉關頭，連理枝間春幾度。
花開花落夢悠悠。

望春曲

桂棟燕來時，楊柳未成絲。
徒然對尊酒，無處覓花枝。
宿雲時吐岫，晨溜更添池。
江洲千里綠，憑此寄相思。

古辭

華年不恒處游子輕遠別風波頓萬里徒使心斷絕邊
朔氣早寒方秋見霜雪盈思阻雲海含悽弄刀篋我有
鴻鴈音傷茲桃李月

中婦織流黃

東隣有思婦殘機中夜開衣聲遙綵縵腕影自徘徊桂
寒知氣肅絲長覺漏催鴻鴈將愁遠絡緯共鳴哀隔漢
星難渡聯雲錦易裁欲知腸已斷繁梭日幾回

桃花曲二首

潞河有桃花口甫子過之悅其名而惜不見
一花也因為賦此

問訊桃花口尋芳悅爾名啼鶯不住嘯知我繫舟情

其二

落錦已芳塵殘江非暮春桃花不待客芳草欲迷人

北斗篇

北斗迴高明陽氣宣九垓俯垂青達日遙接紫宮春撫

時激壯節覽鏡嗟沉淪局巖多末軌廣步焉足循雜霰
下階扉寒色餘荆榛窮巷無行車不耻長臥人我辰諒
安在雲龍一朝伸朝奏暮還召主父寧久貧裂土貴一
言歸為五湖賓男兒重快意鍾鼎非所珍寓言復痛飲
書懷告情親昔賢未可測思與范蔡倫

游仙

層林隱瑤碣石房構雲楹寒山永鬱岬靈谿自迴紫竭
來厭塵網微志徇長生投散偁榛塗駕鶴履芝庭舉手

攀若枝游目玩蓬瀛既撫姮娥絃亦聆王子笙容成悅
朋來安期眷同升衆仙歛衽止瓊鑾翩相迎高蹈謝世
人何時復來并奇齡叅日月豈為物象傾

順東西門行

出西門步北郭行歌發商眺寥廓孟門道呂梁壑他人
有心豈予度化密移景昭鑠嗟古之逝誰可作數苟奇
生不若朝為繁華夕零落聊永日命深酌何以自寬樂
三樂

九日橫塘曲二首

蘅薄晚流芳
菱歌鬪綺粧
願因塘上月
拂袖舞君傍

其二

我有潘安賦
偏多宋玉愁
今來對山水
忘却故園秋

寒夜曲四首

碧殿金風生
綺紈宮槐吹
盡不留殘沉
沉月到苔陰
上
添却簾櫳無
數寒

其二

空庭藹藹月凝霜銀燭無光玉漏長清漢數聲征鴈度
夢回中夜憶遼陽

其三

寒切雕窓透錦茵殘更望斷履綦塵空閨不恨飛霜夜
總使春來益黯神

其四

玉衡低戶夜無聲月色籠寒照不明燈火漸催迎早歲
綠窓愁殺近啼鶯

皇甫少玄集卷二

欽定四庫全書

皇甫少玄集卷三

明 皇甫湜 撰

扈從

丁亥之冬車駕有事於山陵予以儀曹扈從

肅躬事陵邑崇衛陟園丘弭情蹕露苑卹頓霜疇感
深側淪化孝達茂光猷宵冬夙嚴駕曙彩乍揚旂鸞笳
警寒月軒軒翊素虬淒飈循埏響離靄匝垌浮瑤律衍

帝穆玉寢開聖憂資縞泣始瀝曳綈芳未適瞻樞疚電
忽登渚悵虹流爰發熙乾續時文濬隆周鴻徽軼往薦
裡懿裕來休飭嘗諏卜揆升鬯衍玄幽沐恩奉行役服
義切思謳哀風庶結撰景雲方出游

冬日從駕山陵五首

鼎湖風露積橋山烟霧深哀敬鍾嚴寢順動蹕穹林霞
闕迎晨旭霜吟引鸞音萬騎屯蒼巘千旅藹碧潯

其二

鳳野移霄漏虎戟警宸威連營奕漢轉登隴朔雲飛乍
聽征笳發時聞候騎歸心旌懸捧日藜藿愧輕微

其三

帷宮徙澗道緹縠擁巖隈山川百神扈車駕七陵來旌
文鬱氣肅鏐影日華開愧乏球琳響徒聞枚朔才

其四

霄磴窮巖險化迹表玄幽松風揚玉隧桂霧隱珠丘俎
豆因時展衣冠異月遊百王既以邁千祀諒非修

其五

八埏總休瑞萬寓泱民和復此歲
蕤日侍駕靈山阿闕
殿金芝滿甘泉玉樹多方觀景雲出珥筆奏昌歌

初夏金山扈遊恭述十二韻

南極春星改西岑晝景長奉慈移輦出詔幸指山陽淑
氣團晴靄靈河瀉曙光先驅蹕御宿侍女發披香翳日
雕麾引凌空翠幃翔鯨波仙杖外龍沼禁城傍劒躍彤
巖晃鑒飄錦瀨鏘帷宮扶玉樹緹騎繞金湟跨谷虹梁

屬疏霞鳳陞張峒山期間道瑤水戒巡方鳥下宸襟洽
雲飛寶思揚昆池寧習戰文德佇來王

西湖行樂辭六首從駕山陵作

綵霞迎曙雨光收御幄城西蕩碧流青鳥遙依仙母扇
白魚偏入武王舟花含瑞日千旗映柳拂和烟兩岸浮
自慶叨從簪紱後獨將麗藻從宸遊

其二

千峯翠靄俯神池傳道花間奏水嬉簫鼓疑從雲際起

旂旌若在鏡中移香臺抱日團朱麓靈樹含春漾碧漪
文物歲蕤承聖主太平遊豫盛前規

其三

先朝遺迹在層巒西望行宮紫翠蟠金洞松陰曾駐鶴
瑤壇竹實舊棲鸞重開日月邀仙賞長繞雲霞扈帝觀
北極幸霑堯酒澤南薰願嗣舜琴歡

其四

衛士傳呼蹕上方才人一半下昭陽
矯臨綠水承恩賞

艷比紅霞出世粧
潤吐銀潢流帝樂
花開珠樹散天香
皇家不避褰中暑
自有金莖玉露涼

其五

鸞輿晨下鳳城來
藻景文波相映開
丹仗遠隨金鸞轉
錦檣齊拂石鯨迴
直從花裡披仙苑
疑向天中結帝臺
長奉慈遊歡不極
未央今笑萬年杯

其六

君王孝德本光天
龍舸春遊霄漢邊
微靄起時窺鳳嶺

瑤星流處指虹川日薰山氣凝成彩風入鑪香散作烟
扈從謬叅枚朔侶銜恩還欲獻甘泉

五日廷宴和唐陳二編修

北闕晴雲畫漏聞中天麗日綺筵分魚歌鎬宴歡依藻
鳳舞虞絃曲奏薰蘭葉正調仙鼎實榴花初泛御杯芬
更誇續命傳金縷願以堯年祝聖君

平臺山扈從

昔駐文皇輦歡傳萬壽杯誰言紫霄上重見翠華來曉

樹峯巒合春花棟宇開勝圖臨塞壤嘉蹟改平臺豫蹕
承雲轉靈旂繞澗廻捫天叨法從遊聖愧仙才

省署

朔旦候朝紀事二首

正殿春朝朔蒼旂發五鐘仙歌應翥鳳法駕擬驂龍候
履星初落趨闈霧稍濃已聞傳聖豫還想覲天容

其二

瑞旦奠先啓韶光柳半催三軍銷祲氣五老暎星台武

德超前紀文華集上才空憐襍被客鵷鷺日超陪

贊治堂詩

往欽崇濬哲俾率感幽玄聖情凝岳命熙化懋殷年泰
交符帝軌隆纂眷英賢靈蘊啟頽焚孚議值昭宣惠澤
滋漢流洪構憑雲騫端榮抗彤霞交疏揚綵烟泪越麗
太微迢嶢輝中天廣猷適靜謐敷緯宴嬀娟奕奕宸藻
煥皎皎列宿懸惟昔建邦禮委紀振昌言朝夕表震光
壇圻辨方圓億祀會有極百度率無愆升裡暢人神洽

祉悅鱗翰從文道斯集鑒憲義所甄德偉遠彌亮馨烈
久更延載瞻忝末位陳頌愧茲篇

夜直虞衡

藹宇撫獨夜廣庭發虛照雨餘雲氣清披襟坐森奧涼
風四面至踈林月微曜寢務釋我勞澹然協所好俯慚
乏才智空勗孤貞操時往化屢遷名存事多謬逝矣山
澤遺紛穢殊苦約即文懋有恪訐尤良畏蹈處順謂可
恒終想東山嘯且秉委吏心寧貽衆賢誚

春日移居

移居春日暮蓬轉跡俱輕計拙勞何補名微恨敢生
畱連花拂袂歷亂絮隨纓更有相將燕飛鳴感去情

移居五首

修景無畱序朱明已盡移每多漂轉恨正奈別離時
惜去雲空倚含愁雨欲隨吾廬一回首竹石自江湄

其二

地濶關河北山長殿闕西吏情天外遠鄉思日邊迷
江

海方容往蓬蒿或可棲弊帷新未得能厭數相携

其三

世事易為感吾儕有闔廬未嫌煩里旅終念近皇居清
曠心宜得歡娛計莫疎王猷還愛竹曾使拂秋虛

其四

省暇情營逼浮生苦不禁草明晞露意蔓弱裊風心且
自看塵甌無須問舍金燕南思骨肉愁絕倚樓吟

其五

通籍名殊忝西墉暫與期守玄非顧默得白定從衰忝
谷寒光劇榆河月漫悲琴鳴山滿室予慕古人為

省中述懷

鑪省炎蒸起坐妨水波雲動似生涼荷花若共違三伏
棣萼何堪滯兩鄉別去緘題能自少貧來假貸不辭忙
土風移佳腸今斷更聽蟬聲滿夕陽

冬日齋中遣抱

起坐空齋悵有思上冬雲物倍天涯負霜孤鶴時看影

照日餘花欲墮枝一別素綦蓬鬢改數拋綳帙壯心知
長愁假翼同懷側霞海冥冥去不遲

皇甫少玄集卷三

欽定四庫全書

皇甫少玄集卷四

明 皇甫湜 撰

時序

早春雜詩

緬予休役暇非復念行藏葺林西郊外放歌東溪傍滄
波蚪鸞影幽藪雲霞光晨起聆候禽則知歲載芳靈雨
降膏澤和風自飄揚含蕤挺故莖伏泉湧新防白室但

虛偃青山惟坐忘逍遙歲寒娛覆以悲春陽

早春寓目

玉螭晴光起銅龍淑氣鮮和風雕檻度曙靄絳河連水
動蘭池早香歸蕙殿先庭梅微綴雪宮柳漸浮烟麗日
銜珠網新霞絢綺錢西山重錦外南圃萬花前靈鮪攄
鱗躍時禽挾翠翩客心將物色駘蕩不勝妍

春朝雪後

拂曙啓荒扉雪照蘭林瑩迥榭眺氛氲層原閱彌亘春

動鳥數聲晴開烟一徑欲訪垂綸人悠然五湖興

早春雪後看雨

雪罷清江曙春隨細雨來郊西好風景柳色半樓臺散
漫兼空淨芳菲觸處催行雲自無意恠得潤莓苔

久雨

冥雨春城暮凌江棟宇浮雲蒸平巨澤颺迥蔽崇丘林
鳥鳴何意溪花落自愁長懷訪任釣萬里獨乘流

雨和子約

金匱要略卷四
巖陰朝帶霧川氛時掩曦襲鱗雲正聚翻泉雷忽垂疊
疊林氛交飈飈震響移瞻空乏矯翼逐泛有傾軫軒幌
搖波色衣舄染苔滋方懽偶沮溺秉耒問東菑

春懷

芳霧歛岡岑華日照川隰散暘暄氣迎延佇惠芬集寒
條競已熙朋鳥鳴相及即事聊淹留眷物重維繫美人
曠不并徒此春風入

春日齊中即事

仲春氣妍和崇蘭幽可蹇開軒眺遠野文霞靄曾巖黃
鳥鳴芳菲綠蘋泛清淺感物懷古人緇帙聊自展嘗欽
柳下黜頗悅邴生免苟持齊物心得喪兩俱遣

後湖官舍春暮漫興二首

湖上春歸早雲山滿目愁洗心成浪語終日對滄洲

其二

啼鳥青山舍飛花碧樹林金門雖異跡避世且同心

晚春對酒

幽獨寡懽悰齋扉賦雲物稍從禁火謠方追曲水後春
心不自持春事遽云訖語燕驚空帷飛花笑羈紱澄江
碧遺施遙巒翠岷岫旨酒以遊遨無為坐委鬱

晚酌聊賦

雲歸遙情結山迥孤懷寄靜曠池卉交停瑟娛景媚予
本丘壑人牽謬廁朝寺違跡撫墜辰索處謝凋志中林
夕鳥鳴無為亂腸思

雨坐

偃息苦昏墊營房氣已踰溪冥疑臘在花落果春無

霽

山城漸霽色墟野展輕烟鶴影迴容日江聲流暮天清
風到戶牖高興動林泉落照散屨杖滄波思扣舷

上巳篇

雲起成周地春深河曲祠茂弘華轂羅賢日東晝黃金
賜對時平明結伴閭門出歌舞春陽麗服宜橫塘水滿
桃花色繡舫雕欄翠幙移穿桃傍柳清川宴灞水流杯

那足羨酣賞唯愁西日沉人情但使浮雲變美人攀花
玳瑁筵王孫歸馬珊瑚鞭花容馬影紅相亂劇樂番為
衆所憐東山却憶觴咏輩洛浦爭疑環珮仙片片波搖
范粲日霏霏憶舉越溪烟錦繡山川非畫裏吳越興亡
真眼前人生為樂當及時世上無過達者賢淒涼斷魄
蘭中續寂寞虛名袂外傳恐君厭盡華燈醉不惜高歌
上巳篇

良辰行二首

四月十四日吳人相傳仙降日也子循弟作
詩紀之余遂賦此

朝陽生東海景曜被神州翩翩青鸞羽遠自崑崙丘三
珠縈其榮翔輝薄天浮容成歛戾止宓妃方來遊

其二

祥飈扇桂樹宮闕鬱中天良辰忽我與舉手謁衆仙六
翮乃我體衆駕凌雲烟遨遊樂相樂遐哉億斯年

五日

長夏園林過客稀
青山終日歎柴扉
支離且念從吾好
瓢落那辭與物違
多病無端簪笏在
滄洲何事歲華非
不知鳴鳥愁中變
漫倒花卮送晚暉

夏日偶作

別都謝明略懷疴感歲時
方歎青春逝忽驚朱明移
蘭崇露初滿桐引雲彌滋
餘花分照砌幽鳥各鳴枝
寂寞君公隱埽堦敬通悲
惟應延藻月泛瑟慰遙思

日蝕

日蝕元徵異千官集禮闈遙知薄海國同候太陽輝
夾道喧鼗鼓承播麗珮衣時無梓裨輩誰與測幾微

立秋日和王子惟楨

園中日照微草際泉流潔徙倚眷茲辰胡然屆素節澄
霞稍異色淒氣俄以結簷鳥行當辭林蜩鳴復絕層雲
捲猶浪餘花落如雪清風徒自多蘭茗不堪折美人其
惠來登携眺寥泬

早秋述詠

金日人巳居今三十一
卷四
流火忽云屆清風結我思草虫悲索處蕭葛感驚時霞
曠芳樽適雲深碧海期鄭興不復仕蓮勺邇方辭

秋夕

颯颯風氣涼漫漫夜何長感物念易集客子憂多方
櫺軒散余矚皎月流素光川途夕簞亂巖際高雲揚星
迢急還烏露下悲寒螢以茲春徂景況乃懷故鄉愁來
填人膺誰能假瑟簧

中秋前夕不寐

小庭華月色永夜坐清輝故國人頻憶滄江舟獨歸且
憑孤影慰莫歎寸心違無奈休文病時時省帶圍

十六夜月二首

待月坐江水月明江正流長吟惜佳景高興在南樓魯
酒碧山醉胡床清桂留有情望今古寂寞漢宮秋

其二

牛渚風流地關山萬里長今宵懷謝尚江上益清狂勝
事亦云盡佳期不可忘涼風吹舞袖白苧滿秋霜

雨

燕京又八月愁度散絲朝涼氣霑扉重雲陰布野遙晚
聲傳院杵秋意撼林颿北眺氤氲色懸知傍九霄

九日二首

金祗辰屢改玉琯氣方遒肅宇瞻霏淨遙汀識潦收鷗
鳴入怨柱蛩響切離凋楓落他鄉早尊寒故國秋賈生
嘗遠謫平子本多愁迥榭聊憑覽難銷寓目憂

其二

蕭辰脩云季並應值茲晨落桂銷寒獻遵鴻引暮津河
虛平夕霧閣掩澹秋塵素月昇逾靜高霞歛更新調絃
空對酒倚檻重懷人欲寄相思曲浮雲不可因

帝京九日

清秋是節最嘉祥魏主稱書悅久長已聞勝麗矜高會
况復遨遊屬帝鄉曉結香輪馳玉岸晴飛翠幃駐金塘
才人錦簇盤龍帔公子雲搖七寶裝朝回競接千鍾宴
射罷還臨百戲場姣服姁媮齊致態紅顏睇眄轉流光

華燭初熒羅袖舉梁塵欲下綺絃張俱言獻壽情無極
共惜為歡夜未央羈客登臨時已晚天涯風物思堪傷
獨倚青霞閒陟榭徒對黃花不盡觴求友開襟眺芳甸
故嶺迢迢那可見何處網緼海上山苦聞嘹唳天南鴈
嗟予六載客華京誰憐官學兩無成官拙只言題漢柱
力微不解請長纓顏駟為郎幾度秋子州多病自幽憂
抗雲擬荅班生戲俟河學賦仲宣樓坐憶吳臺舊風俗
携舟帳飲滄江曲零落淮南幾株桂惆悵東籬數叢菊

禁林終宴出層闈青驪更向小平津北門微懸衡漢影
西山遙靜屬車塵忘憂竹葉情非昨辟惡萸房鬢是新
欲逃神虎辭明代且托靈魚報故人

九日北峯臨眺偕同省諸公

褰帷漱灑歷禪宮更踐莓苔雲徑通載酒登龍聊暇日
揮毫倚馬見羣公語迴斜照岩容變坐度冷風海勢空
俯檻驚時還極目江天何事有飛鴻

搖落

搖落滄江上驚心歲月徂
看花憐曉鏡倚杖惜良圖
排悶劉楨好沾巾阮籍途還聞閉蓬戶獨酌似潛夫

郊泛秋懷

緬予滯河魏嘗亦賦懷
田衛水歸華急江鴻旅思懸
役車離歲月穡事近霜天更
逐樵風去滄洲何處邊

秋夜憶山中

悵茲豐景淪感此流暉馳
青霄有翔隼落蓋多寒枝
徒對盈樽酒美人不共持
聊且娛心憂華月泛金池
意隨

流波結情逐孤雲移猿鳴鶴以怨歲暮何遠為

杪秋索居即事

索居坐度玄陰結今日煩憂未能說遙睇江頭不見雲
可堪鬢裏新成雪風落寒郊葉下頻濁醪踈雨自相親
欲向東籬惜酩酊其奈黃花偏傍人

寒朝對菊獨酌命篇

晨起望寒山曠然謝羈紲雖值風雨晦美與囂塵絕踈
花破孤閒靜心自怡悅小室幸易安清尊誰能缺興想

籬下人高名照雲霓白頭何為者方欲理官轍

寒夜獨坐

宵陰自虛寂獨鶴林中歸行度桂華晚坐令心事微滄
洲閒處是青瑣夢來非無客慰孤影悠悠寒月輝

林居歲暮

苔徑下雲陰蕭然坐石林一為顛顚客頻感歲時心琴
憶鍾期聽山懷向子尋清尊休放却所慮日應深

歲暮夕坐獨酌成篇

崇陰寂玄景窮律歎宵期玉衡稍流映方冬寒彩微天
高霜氣結何能覩雲輝惟我客游子苦顏心屢摧掩閨
不成寢朱火暖單帷蕙蔭久已歇瑤華誰獨貽臨觴意
空縈懷春悵有違願言假桂檝容與清江湄

卒歲詠

年過四十頭二毛九命一官仍散曹長嘯歸來何所有
耕罷陂田臥虛牖病居誰賣尉佗裝放歌日醉淵明酒
春風欲到五柳枝旁人不語心自唾歲去年來只如此

跌宕文史徙爾為

歲暮對雨獨酌二首

愁坐衡門裏蕭蕭雨助寒誰憐澤畔客放逐歲華殘

其二

賞心終不有徒對一樽開為語春風道無煩谷口來

江南臘月

不見垂楊與綠蘋江城烟色雨餘新數家竹樹輕寒外
一道溪流淡蕩春

癸卯除夕直北曹作

獨馬向寒烟青陽春明發霜淨肅蘭池雲沈迥丹闕林
阡磨易聚江天鴈難沒風物悵徂陰芳菲詎久歇紛庭
默多惧巖闥坐愁越夙心愧盈尊含情非華髮

除夕與孔學憲

掩閣機乍息馳陰念所滋眷茲不遑寧平易浩無施趨
曹薄季冬去國復追期俛仰一世間松喬誰能為漫目
靄湖陽雲山有餘悲之子惠同襟委化開予思謹爾綢

繆故聊以忘歲時

皇甫少玄集卷四